


E mayoria den hospital no ta content cu maneho actual

Dr. Falconi lo keda cu e posicion como director pa 4 luna mas alaves lo habri solicitud nobo



ORANJESTAD(AAN): For di aña pasa a worde treci padilanti cu contract di dr Haime Falconi como directo di Hospital ta termina fin di januari 2014. DIARIO a acerca Minister Alex Schwengle riba e situacion aki y ta duna di conoce cu Hospital tin un raad van toezicht cu ta tene bista riba e maneho di e director y e director ta maneha e hospital. Asina e proceso a worde stipula den e fundacion y na unda cu hospital ta funciona riba su mes. Normalmente Gobierno no tin nada di haber cu a maneho di

hospital segun minister Alex Schwengle.

E unico influencia gobierno por tin den Hospital ta via di raad van toezicht door cu gobierno tin dos persona apunta den e comision aki. Segun minister Schwengle tabata tin hopi discusion cu a tuma luga den diferente gruponan den hospital y na unda cu e conclusion di mayoria ta cu nan no ta content cu e maneho cu tin actualmente na Hospital. E situacion a bira un situacion cu no por a yega na un punto ki decision por a worde tuma. Segun Min-

ister Schwengle e impresion cu gobierno a haya door di e diferente kehonan ta pone e situacion bira fastioso unda cu ta crea discusion di gobernacion den hospital y e situacion aki no ta aceptable. Na momento cu e situacion bira asina delicado gobierno mester para fuerte pa e protection di interes nacional y sinta na mesa cu raad van advies y esunnan cu ta maneha hospital pa asina hunto yega na un solucion.

Tabata tin varios reunionnan cu a tuma luga y a papia riba diferente topico pa loke

ta trata e maneho di hospital, alaves tambe e posicion di e director actual ya cu su contract ta terminando pa fin di januari 2014. Sinembargo director di hospital sr falconi tin sosten di un grupo y na unda cu e otro grupo nan cu ta forma parti di hospital no ta content cu e maneho. Minister Schwengle ta duna di conoce cu su persona a sinta na mesa cu tur e grupo y a dicidi conhuntamente cu e 4 luna nan nos dilanti cuminsando for di 1 februari 2014 nada lo no bay cambia. Raad van toezich y e board di hospital lo keda manera cu e ta actualmente unda cu dr Falconi lo keda cu e posicion como director pa 4 luna mas y esaki ta conta tambe pa e otro miembronan di esunnan cu ta maneha hospital tambe.

Hunto dentro di 4 luna lo busca e miho forma pa un estructura di maneho pa hospital. Despues di 4 luna lo tin cambio cu mester worde haci pa un calidad miho di hospital pa nos ciudadanonan. Minister di salubridad publico ta boga pa un miho estructura pa hospital sin punta dede ken lo por ta sinta como director na e momento nan ey. Actualmente ta trahando duro pa un estructura nobo cu ta pas na Aruba, unda cu lo bay tin diferente cambionan cu lo tuma luga y sigur mester bin cu un cambio y habri solicitud pa un director nobo. Segun minister Schwengle na momento cu ta papia di haci cambio di un estructura completo di hos-



pital ta papia tambe di posicionnan nobo y un maneho completamente nobo.

Pa ley tambe lo mester bin cu un redefinicion di e lideran cu lo bay maneha e hospital pa un direccion nobo. Pronto lo habri un solicitud pa esunnan cu ta interesa pa guia y pusha hospital di Aruba den un miho direccion. Segun Minister di salubridad no necesariamente e mester ta un dokter, pero e por ta un nurse tambe cu tin e capacidad di maneho y gana di haci cambio pa mehora hospital pa un proximo nivel. Segun Minister Schwengle aki na Aruba nos no ta custumbra cu un nurse capacita por maneha un hospital, sinembargo na merca y otro islanan di afo ta hibando e maneho aki caba, tur esaki ta dependiendo di e diplomanan y capacidat cu e persona por tin. Segun minister Schwengle tur persona cu ta sinti cu nan ta capacita pa maneha un hospital nan ta bon bini pa solicita, pero si mester tene cuenta di e criterionan y e exigencianan cu lo pidi pa e future lidernan di maneho di Hospital.